

PIST. *Germen* ovatum, medietate superiori trigono-pyramidatum: angulis subacutis. *Stylus* filiformis, rectus, simplex, calyce paulo minor. *Stigma* capitato-obtusum, simplex, apice levissime emarginato.

PER. *Capsula* ovata, medietate superiori trigona, calyce tecta, unilocularis, ad medium trifariam dehiscens.

SEM. plurima, oblonga, utrinque acuta, minutissima.

Color Calycum incanus, marginibus subalbis; *Germi- nis* luteo-viridis, *stigmatis & Antherarum* luteus.

Ab Illeebro spurio (*Laslingia*) cui proxime accedit, differt corolla nulla; calyce obtusiore ovali, foliolis integris oblongis; ob stylum unicum alias proxima.

LOEFLINGIA.

LOEFLINGIA *hispanica* (Illecebrum spurium Lœfl.).

Habitat Madriti in collibus nudis cis Casam del Campo, supra saltum, vulgo foto de Migas calientis, copiose.

Radix tortuosa, descendens, ramosa, glabra, annua.

Caulis solitarii vel plures, profusi, procumbentes, sursum paullo ascendentes articulati, teretes, pilis viscidis tenuissime pubescentes, longitudine semiunciali vel digitali.

Folia opposita, ad genicula inferiora, lineari-acuta, minima, ad basin denticulo utrinque acuto, brevissimo erecto notata; superiora subulato-tridentata: denticulis lateralibus erectis in medio latere folii.

Flores sessiles, axillares in spicis lateralibus alternis, imbricati, conferti.

Bractee subulatæ, tridentatæ, parvæ, imbricatæ.

CAL. *Perianthium* pentaphyllum, erectum: *foliolis* distinctis, lanceolatis, leviter intus inferius concavis, apice tereti subulato acutissimo, pilo quasi terminato, lateribus similiter ac folio denticulo utrinque subulato, brevissimo notatis, interioribus tribus intus quasi coloratis, foras omnibus subviscosis.

COR. *Petala* quinque (non raro solum quatuor, quantum est possibile videre), minutissima, oblongo-ovata, globosa, conniventia, integerrima.

H

STAM.